



Salasa, 26 Desember 2023

Ogen: Lukas 2:17-20



Nuriken Man Kalak Si Deban



Berita hoax (bual, la tuhu) i jah i je lit. Ipembarken alu tujun ndatken keuntungan man si pembarkenca. Buena berita si bagenda erbahanca turah curiga nandangi teptep berita sinialoken. E maka "siksik lebe maka tindes" nina orang tua sindube.

Permakan ndatken berita maka tubuh me Juruslamat man doni enda. Lit tanda-tanda sinituriken e me anak e ibaluti alu uis, medem bas pelangkah. Kenca ialoken permakan berita e, minter ia berkat guna mbuktiken kebenaran berita e. payo maka kai sinituriken e tuhu iidahna, isaksikenna. Tapi la ngadi terjeng bas permakan, iturikenna ka me man Jusup ras Maria kerina si ibegina ndube. Meriah ukurna, aminna pe erdalan mentasi erbage situasi perdalanen, sabap kai si ibegina e tuhu-tuhu jadi. Mulihken ia, rende ia muji dengen mpemuliaken Dibata. Kai sibegina ndube payo bagi sinikataken.

Wari enda siperingeti me natal sipeduaken, enggo sibegiken kerna ketubuhan Jesus ku bas doni enda maba keselamatan. Enggo melala kotbah-kotbah natal sinibegiken kita subuk natal PJJ, kategoria, persadan, pendahin ras sidebanna. I bas kerinana e sada tujunna segelah la ngadi terjeng megi-megi saja, tapi lit tugas siniarus man dahinken. Turiken ka man kalak sideban. Nuriken kebenaran ketubuhan Juruslamat e banci ilakoken alu erbage cara, banci me arah perbahanen siicidahken kita selaku kalak sienggo ngaloken Jesus i bas pusuhta, bage pe bagi silakoken permakan "rende muji Dibata." Nehken ndenden puji enggo jadi kebiasaan/tradisi bas gerejanta. Meriah ukurta nehken puji man Dibata arah tampilan-tampilenta subuk solo, vocalgroup, bage pe koor. Nde-nden enda jadi persembahen man Jesus si tubuh e. Saja, ula min terjeng paksa Natal tapi lakokenlah i bas segedang perdalanen kegeluhenta. Arah si e idengkehken kalak me berita e, janah berita e berita situhu-tuhu.

☞ "Beritakenlah berita kerna Jesus man kerina jelma"



